



MALAYSIA
MADANI



إدارة الترويج والإعلام
JABATAN KEMAJUAN ISLAM MALAYSIA



MAAL HIJRAH
1446H / 2024M

B U L E T I N K H A S

MAAL HIJRAH

Hijrah membentuk
kehidupan yang

HARMONI *dalam*
KEPELBAGAIAN

bangsa dan agama
di Madinah

Memahami

*Maksud &
Tujuan
Hijrah*

Piagam Madinah

Asas Perpaduan
Multi Etnik dan Agama

Hijrah:

Membina Nilai
**Ketuhanan &
Kemanusiaan**

Hikmah
Peristiwa Hijrah
dalam
Mendepani Cabaran

*Masyarakat
Majmuk*

Menangkap Tulus Hijrah

Oleh :
Dr. Mohamed Nazreen Shahul Hamid

*Pensyarah Kanan Pusat Pengajian Bahasa,
Tamadun dan Falsafah (SLCP)
Universiti Utara Malaysia*



Dari Makkah ke Madinah, langkah penuh makna,
Perjalanan hijrah, suci hati nan bersih jiwa,
Membawa harapan, meniti hari baharu,
Mengukir sejarah, memahat ajaran di kalbu.

Bulan Muharam saksi bisu, langit biru menggema,
Rasulullah memimpin bersama sabar dan cinta tema
Setiap langkah di bumi, tinggalkan jejak iman,
Menuju Madinah, terbentang jalan persaudaraan.

Hijrah bukan hanya, pindah zahir,
Tapi mengubah diri, menuju ideal,
Tinggalkan keburukan, mengejar baik tiada henti,
Membentuk hati bersih,
Tenang,
Penuh bakti.

Maal Hijrah ajarkan kita,
Tiada berputus asa,
Dalam mencari cahaya,
Di tengah gelapnya dunia.

Moga Hijrah kali ini,
Lebih dari memori,
Menjadi titik pulang dalam hidup dan cerita diri,
Membawa dekat kepada Ilahi yang satu,
Meraih kasih-Nya, dalam hijrah yang abadi dan tulus.



Isi KADUNGAN

TAJUK	PENULIS	
• HIJRAH MEMBENTUK KEHIDUPAN YANG HARMONI DALAM KEPELBAGAIAN BANGSA DAN AGAMA DI MADINAH	Khairul Azman Azizan	01
• HIKMAH PERISTIWA HIJRAH DALAM MENDEPANI CABARAN MASYARAKAT MAJMUK	Prof. Madya Dr Shahir Akram b. Hassan	03
• PIAGAM MADINAH ASAS PERPADUAN MULTI ETNIK DAN AGAMA	Nor Dalilah bt. Zakaria	05
• TADABBUR AYAT AL-QURAN BERKAITAN HIJRAH	Dr. Mohd Zamir b. Bahall	09
• MUKJIZAT DALAM PERISTIWA HIJRAH	Suhaizam bt. Sulaiman	13
• MENELADANI PERANCANGAN, SEMANGAT DAN MINDA HIJRAH RASULULLAH SAW	Shamrifah bt. Dahalan	15
• MEMAHAMI MAKSUD DAN TUJUAN HIJRAH	Majidah bt. Mat Jusoh	19
• HIJRAH: MEMBINA NILAI KETUHANAN DAN KEMANUSIAAN	Dr. Mohd Izwan b. Md Yusof	21
• IBRAH PERISTIWA HIJRAH RASULULLAH SAW	Norzaidan b. Haji Hamad	25

Sidang REDAKSI



Penaung

Datin Paduka Hajah Hakimah binti Mohd Yusoff
(Ketua Pengarah JAKIM)



Penasihat

Dr. Haji Ruslan bin Said
(Timbalan Ketua Pengarah (Operasi))



Ketua Pengarang

Azman bin Mat Hassan
(Pengarah Bahagian Penerbitan, JAKIM)



Pengarang

Khairul Azman bin Azizan



Pen. Pengarang

Nur Modiah binti Rakes Junaidi



Penyunting

Mohamed Zahir bin Abdul Halim



Pengurus Edaran

Nurul Widyanirza binti Sujan@Jan



Pembantu Edaran

Husna Sahabila binti Mohd Al'Ikhsan



Reka Bentuk

Proyati Sdn. Bhd.



Hijrah

membentuk kehidupan yang harmoni dalam kepelbagaian bangsa dan agama di Madinah

Penghijrahan Nabi Muhammad SAW ke Madinah merupakan salah satu peristiwa penting dalam sejarah Islam. Ia bukan sahaja pergerakan fizikal dari Mekah ke Madinah, tetapi juga melambangkan peralihan daripada zaman kegelapan yang penuh dengan penganiayaan di Mekah kepada penubuhan masyarakat Islam yang kuat dan harmoni di Madinah. Implikasi peristiwa hijrah ke atas penduduk Madinah yang terdiri daripada pelbagai suku kaum dan agama menjadi asas kepada pembentukan masyarakat yang harmoni. Nabi Muhammad SAW telah melaksanakan pelbagai usaha dalam membentuk ummah yang kukuh di Madinah. Dalam memastikan usaha tersebut, baginda telah merangka beberapa strategi antaranya:

Strategi Pertama:

Menyatupadukan kaum Aus dan Khazraj

Sebelum kaum Aus dan Khazraj memeluk Islam, mereka sentiasa bermusuhan dan berperang antara satu sama lain. Namun, kedatangan Rasulullah SAW ke Aqabah telah berjaya menyatukan kaum Aus dan Khazraj melalui Perjanjian Aqabah I dan II. Ini merupakan pembentukan awal masyarakat Islam di Madinah yang dilakukan menerusi dakwah Rasulullah SAW. Selepas termeterainya Perjanjian Aqabah I dan II, kaum Aus dan Khazraj menjemput Nabi Muhammad SAW ke Madinah. Penduduk Madinah menyambut baik kedatangan Rasulullah SAW dan memberi sokongan yang tidak berbelah bagi kepada Rasulullah SAW sehingga mereka digelar golongan ansar.

Strategi Kedua:

Membangunkan masjid sebagai Pusat Kegiatan Dakwah

Rasulullah SAW membina dua masjid yang dijadikan sebagai pusat kegiatan dakwah di Madinah. Pertama, Baginda membina Masjid Quba' pada 8 Rabiulawal tahun pertama Hijrah. Seterusnya apabila Baginda tiba di Madinah, Masjid Nabawi pula dibina sebagai tempat ibadat dan turut dijadikan sebagai pusat pendidikan dan pentadbiran.

Strategi Ketiga:

Mempersaudarakan Golongan Ansar Dan Muhajirin

Di Madinah, masyarakat Islam terdiri daripada golongan Ansar dan Muhajirin. Kaum Muhajirin merupakan golongan yang berhijrah bersama Rasulullah SAW daripada kota Mekah ke kota Madinah manakala kaum ansar adalah golongan Aus dan Khazraj yang merupakan penduduk asal Madinah. Kaum Ansar mempunyai harta dan kekayaan manakala kaum Muhajirin tidak mempunyai harta dan tempat tinggal. Walaupun wujud perbezaan di antara golongan Muhajirin dan Ansar namun Rasulullah SAW berjaya menyatupadukan kedua-dua golongan tersebut atas dasar kesatuan akidah, iaitu keimanan dan ketakwaan kepada Allah SWT. Hubungan persaudaraan Islam dapat diertikan tanpa mengira perbezaan bangsa atau harta.



Strategi Keempat:

Mengguhail Perlembagaan Madinah

Di Madinah, terdapat 3 golongan iaitu golongan Ansar, Muhajirin dan Yahudi. Kaum Yahudi terdiri daripada Bani Qainuqa', Bani Nadhir, Bani Quraizah dan masyarakat Arab yang memeluk agama Yahudi. Oleh yang demikian, Nabi Muhammad SAW membentuk Perlembagaan Madinah atau Piagam Madinah untuk menguruskan pentadbiran negara yang terdiri daripada ketiga-tiga golongan tersebut. Perlembagaan Madinah dibentuk bertujuan untuk menjamin perpaduan dalam kalangan penduduk Madinah. Dalam waktu yang sama, Piagam Madinah mengiktiraf Nabi Muhammad SAW sebagai ketua negara. Piagam ini turut menjamin hak dan kebebasan orang Yahudi untuk meneruskan amalan agama mereka serta menjamin keselamatan orang bukan Islam.

Kesimpulannya, sepanjang perjalanan hidup Rasulullah SAW di Madinah, Baginda banyak berinteraksi dengan pelbagai golongan bagi membina hubungan yang baik dan positif. Hasilnya, nilai persaudaraan yang tulus ikhlas di antara masyarakat Madinah dapat dijamin dalam kehidupan seharian. Hal ini turut diabadikan dalam al-Quran, surah al-Hasyr ayat 9-10:

وَالَّذِينَ تَبَوَّءُوا الدَّارَ وَالْأَيْمَانَ مِنْ قَبْلِهِمْ يُحِبُّونَ مَنْ هَاجَرَ إِلَيْهِمْ وَلَا يَجِدُونَ فِي صُدُورِهِمْ حَاجَةً مِمَّا أُوتُوا وَيُؤْثِرُونَ عَلَى أَنْفُسِهِمْ وَلَوْ كَانَ بِهِمْ خَصَاصَةٌ وَمَنْ يُوقِ شَحْنًا نَفْسِهِ فَأُولَٰئِكَ هُمُ الْمُفْلِحُونَ

Terjemahan: Dan orang-orang (Ansar) yang mendiami negeri (Madinah) serta beriman sebelum mereka, mengasibi orang-orang yang berhijrah ke negeri mereka, dan tidak ada pula dalam hati mereka perasaan berbajatkan apa yang telah diberi kepada orang-orang yang berhijrah itu; dan mereka juga mengutamakan orang-orang yang berhijrah itu lebih daripada diri mereka sendiri, sekalipun mereka dalam keadaan kekurangan dan amat berbajet. Dan (ingatlah), sesiapa yang menjaga serta memelihara dirinya daripada dipengaruhi oleh tabiat babilnya, maka merekalah orang-orang yang berjaya.

وَالَّذِينَ جَاءُوا مِنْ بَعْدِهِمْ يَقُولُونَ رَبَّنَا اغْفِرْ لَنَا وَلِإِخْوَانِنَا الَّذِينَ سَبَقُونَا بِالْإِيمَانِ وَلَا تَجْعَلْ فِي قُلُوبِنَا غِلًا لِلَّذِينَ آمَنُوا رَبَّنَا إِنَّكَ رَءُوفٌ رَحِيمٌ

Terjemahan: Dan orang-orang (Islam) yang datang kemudian daripada mereka (berdoa dengan) berkata: "Wahai Tuhan Kami! Ampunkanlah dosa kami dan dosa saudara-saudara kami yang mendahului kami dalam iman, dan janganlah Engkau jadikan dalam hati perasaan basad dengki dan dendam terhadap orang-orang yang beriman. Wahai Tuhan kami! Sesungguhnya Engkau Amat Melimpah Belas Kasihan dan Rahmat-Mu".

Jelas di sini bahawa hijrah Rasulullah SAW menjadi satu landasan utama dalam membentuk kehidupan yang harmoni dalam kalangan masyarakat yang terdiri daripada pelbagai bangsa dan agama. Kesejahteraan masyarakat juga sangat bergantung kepada sikap toleransi dan bantu-membantu antara satu sama lain. Justeru, umat Islam perlu menyelusuri peristiwa hijrah ini dengan mengambil panduan daripada strategi yang dilaksanakan oleh Rasulullah SAW dalam memastikan matlamat untuk mencapai kehidupan harmoni dalam kepelbagaian bangsa dan agama dapat direalisasikan dalam konteks kehidupan masyarakat Madani di Malaysia.



Hikmah Peristiwa Hijrah dalam mendepani cabaran masyarakat Majmuk

Peristiwa Hijrah adalah salah satu peristiwa paling penting dalam sejarah Islam. Ia bukan sahaja menandakan permulaan kalendar Islam tetapi juga membawa pelbagai pengajaran berharga yang relevan untuk menghadapi cabaran masyarakat majmuk pada hari ini. Hijrah, perpindahan Nabi Muhammad SAW dan para sahabat RA dari Mekah ke Madinah, merupakan contoh teladan dalam menguruskan perbezaan dan membina sebuah masyarakat majmuk yang harmoni. Firman Allah SWT:

فَالَّذِينَ هَاجَرُوا وَأُخْرِجُوا مِنْ دِيَارِهِمْ وَأُوذُوا فِي سَبِيلِي وَقَتَلُوا وَقُتِلُوا لَأُكَفِّرَنَّ عَنْهُمْ سَيِّئَاتِهِمْ وَلَأُدْخِلَنَّهُمْ

جَنَّاتٍ تَجْرِي مِنْ تَحْتِهَا الْأَنْهَارُ ثَوَابًا مِمَّنْ عِنْدِ اللَّهِ وَاللَّهُ عِنْدَهُ حُسْنُ الثَّوَابِ

Maksudnya: Maka orang-orang yang berhijrah (kerana menyelamatkan ugamanya), dan yang diusir ke luar dari tempat tinggalnya, dan juga yang disakiti (dengan berbagai-bagai gangguan) kerana menjalankan agamaKu, dan yang berperang (untuk mempertahankan Islam), dan yang terbunuh (gugur Syahid dalam perang Sabil) – sesungguhnya Aku akan hapuskan kesalahan-kesalahan mereka, dan sesungguhnya Aku akan masukkan mereka ke dalam Syurga yang mengalir di bawahnya beberapa sungai, sebagai pahala dari sisi Allah. Dan di sisi Allah jualah pahala yang sebaik-baiknya (bagi mereka yang beramal soleh)*

(Ali-Imran: 195)

1. Konsep Hijrah: Perpindahan untuk Perubahan Positif

Hijrah melambangkan perpindahan dari keadaan yang penuh tekanan dan penindasan ke suasana yang lebih baik dan produktif. Prinsip ini boleh diaplikasikan dalam konteks moden apabila berhadapan dengan isu-isu sosial dalam masyarakat majmuk. Penghijrahan fizikal mungkin tidak selalu diperlukan, tetapi perpindahan minda dan sikap adalah kunci. Sikap terbuka terhadap perubahan dan penerimaan budaya lain dapat membantu mengurangkan ketegangan dalam masyarakat dan komuniti.

2. Keberanian dan Pengorbanan

Keberanian dan pengorbanan yang ditunjukkan oleh Nabi Muhammad SAW dan para sahabat dalam peristiwa Hijrah memberikan inspirasi untuk menghadapi cabaran. Dalam masyarakat majmuk, keberanian untuk berdialog dan bersedia berkorban demi keharmonian adalah penting. Hal ini mungkin melibatkan pengorbanan ego, masa, atau sumber demi mencapai persefahaman dan kesejahteraan bersama.

3. Strategi Diplomasi dan Persaudaraan

Salah satu hikmah terbesar dalam peristiwa Hijrah adalah pembentukan Piagam Madinah, sebuah dokumen yang mengatur hubungan antara pelbagai kaum dan agama di Madinah. Piagam ini menekankan prinsip keadilan, persamaan, dan hak asasi manusia. Dengan merujuk kepada prinsip ini, masyarakat moden boleh membina dasar yang menghormati keanekaragaman dan menjamin hak setiap individu.

4. Pentingnya Kepemimpinan yang Adil

Hijrah menonjolkan pentingnya kepemimpinan yang adil dan bijaksana dalam menangani masyarakat yang beragama. Nabi Muhammad SAW menunjukkan kepimpinan yang inklusif dan adil, menghormati semua golongan tanpa mengira latar belakang mereka. Kepimpinan seperti ini diperlukan untuk mengatasi cabaran yang timbul dalam masyarakat majmuk, di mana ketidakadilan dan diskriminasi boleh mencetuskan konflik.

5. Pendidikan dan Kesedaran

Peristiwa Hijrah juga mengajarkan pentingnya pendidikan dan kesedaran dalam membina masyarakat yang harmoni. Penerapan nilai-nilai Islam yang murni, seperti toleransi, keadilan, dan belas kasihan, melalui pendidikan boleh membantu membentuk generasi yang lebih bertanggungjawab dan menghormati perbezaan. Pendidikan yang inklusif dan berteraskan nilai-nilai universal ini dapat menjadi alat yang efektif dalam mencegah prasangka dan meningkatkan persefahaman antara komuniti.

6. Kolaborasi dan Kesatuan

Hijrah menekankan pentingnya kolaborasi dan kesatuan antara pelbagai kelompok untuk mencapai matlamat bersama. Di Madinah, Nabi Muhammad SAW berjaya menyatukan suku-suku yang berbeza, menghapuskan permusuhan lama, dan membina masyarakat yang bersatu padu. Dalam konteks moden, kerjasama antara pelbagai pihak termasuk kerajaan, NGO, dan masyarakat umum adalah kunci untuk menangani isu-isu sosial yang kompleks dalam masyarakat majmuk.

7. Penghormatan terhadap Karamah al-Insaniyyah dan Hak Asasi

Penghormatan terhadap Karamah al-Insaniyyah dan hak asasi manusia adalah satu lagi pelajaran penting dari peristiwa Hijrah. Piagam Madinah memberikan hak dan perlindungan kepada semua penduduk, tanpa mengira agama atau etnik. Prinsip ini relevan dalam menangani cabaran masyarakat majmuk hari ini, di mana penghormatan terhadap hak individu adalah asas untuk mencapai keharmonian dan keamanan.

8. Kesabaran dan Ketahanan (Resilience)

Akhirnya, Hijrah mengajar kita tentang pentingnya kesabaran dan ketahanan dalam menghadapi cabaran. Perjalanan dari Mekah ke Madinah bukanlah mudah, namun kesabaran dan ketahanan para sahabat membuahkan hasil yang luar biasa. Dalam konteks masyarakat majmuk, kesabaran dalam menghadapi perbezaan dan ketahanan dalam mengekalkan nilai-nilai murni adalah kunci untuk mencapai kehidupan yang harmoni. Ketahanan juga merupakan kemampuan seseorang atau sesuatu untuk pulih kembali atau bangkit setelah menghadapi kesulitan, tekanan atau perubahan.

Kesimpulan

Peristiwa Hijrah menawarkan pelbagai hikmah dan pengajaran yang relevan untuk menghadapi cabaran masyarakat majmuk pada hari ini. Dengan menerapkan prinsip-prinsip seperti perpindahan sikap, keberanian, diplomasi, kepemimpinan adil, pendidikan, kolaborasi, penghormatan terhadap karamah al-insaniyyah dan hak asasi, serta kesabaran dan ketahanan, masyarakat moden dapat membina sebuah komuniti yang harmoni dan bersatu. Hijrah bukan sekadar peristiwa sejarah, tetapi panduan abadi ke arah membina dunia yang lebih baik.



Oleh:

Nor Dalilah binti Zakaria
Pegawai Hal Ehwal Islam
Bahagian Dakwah, JAKIM



PIAGAM MADINAH

ASAS PERPADUAN

MULTI ETNIK DAN AGAMA

Tahun 1446 Hijrah telah membuka tirainya dan hikmah dari peristiwa hijrah begitu luas yang mencakup berbagai aspek berharga dalam kehidupan manusia. Antaranya memberi iktibar kepada kita agar menghindarkan diri dari lingkungan yang merugikan, berani melakukan perubahan, memperteguhkan iman dan keyakinan atas segala perintah Allah SWT, kepentingan mempereratkan persaudaraan dan persefahaman dalam membangun kualiti hidup bermasyarakat bagi kesinambungan generasi berikutnya. Penulisan ini menghuraikan tentang Piagam Madinah yang merupakan perlembagaan bertulis pertama di dunia sebagai asas perpaduan kepelbagaian bangsa dan agama. Piagam Madinah turut dinamakan sebagai 'Sahifah al-Madinah' telah dimeterai pada tahun pertama hijrah Rasulullah SAW dan para sahabat ke Madinah al-Munawwarah iaitu bersamaan tahun 622M.

Kepelbagaian etnik merupakan satu bukti keagungan Allah SWT yang dapat dilihat di seluruh dunia termasuklah Malaysia. Firman Allah di dalam surah al-Hujurat, ayat 13:

يَا أَيُّهَا النَّاسُ إِنَّا خَلَقْنَاكُمْ مِنْ ذَكَرٍ وَأُنْثَىٰ وَجَعَلْنَاكُمْ شُعُوبًا وَقَبَائِلَ لِتَعَارَفُوا إِنَّ أَكْرَمَكُمْ عِنْدَ اللَّهِ أَتْقَىٰكُمْ إِنَّ اللَّهَ عَلِيمٌ خَبِيرٌ

Terjemahan: Wahai umat manusia! Sebenarnya Kami telah menciptakan kamu dari lelaki dan perempuan dan Kami telah menjadikan kamu berbagai bangsa dan berketurunan puak, supaya kamu berkenal-kenalan (dan beramah mesra antara satu dengan yang lain). Sebenarnya semulia-mulia kamu di sisi Allah ialah orang yang lebih takwanya di antara kamu, (bukan yang lebih keturunan atau bangsanya). Sebenarnya Allah Maha Mengetahui, lagi Maha Mendalam Pengetahuan-Nya (akan keadaan dan amalan kamu).

Keharmonian masyarakat pelbagai kaum dan agama merupakan identiti unik yang dimiliki oleh Malaysia sejak kemerdekaan. Hakikatnya, kerencaman dan kepelbagaian yang wujud menimbulkan keragaman yang berbeza dan boleh menimbulkan kecelaruan dalam sesebuah negara. Usaha mengekalkan keharmonian ini sudah pastinya berhadapan dengan pelbagai cabaran terutamanya pada era ledakan teknologi maklumat dan komunikasi. Namun demikian, pendekatan yang bijaksana dan bersifat inklusif tanpa mengetepikan mana-mana kaum di Malaysia membolehkan negara ini kekal harmoni dan membangun dengan kepelbagaian yang ada.



Jika dilihat kepada perkara utama yang terkandung dalam Piagam Madinah adalah:

1

Nabi Muhammad SAW adalah ketua negara untuk semua penduduk Madinah dan segala pertelingkaran hendaklah merujuk kepada Baginda.

2

Semua penduduk Madinah ditegah bermusuhan atau menanam hasad dengki sesama sendiri, sebaliknya mereka hendaklah bersatu dalam satu bangsa iaitu bangsa Madinah.

3

Semua penduduk Madinah bebas mengamalkan adat istiadat upacara keagamaan masing-masing.

4

Semua penduduk Madinah hendaklah bekerjasama dalam membangunkan ekonomi dan mempertahankan kota Madinah dari serangan oleh musuh-musuh dari luar Madinah.

5

Keselamatan orang Yahudi adalah terjamin selagi mereka taat kepada perjanjian yang tercatat dalam piagam tersebut.

Iktibar melalui Piagam Madinah yang telah dilaksanakan oleh Baginda Junjungan Besar Nabi Muhammad SAW adalah dengan menguatkuasakan undang-undang sebagai kawalan sosial masyarakat setempat. Terdapat dua jenis kawalan sosial iaitu pertama; kawalan sosial secara langsung merupakan undang-undang yang mengikat masyarakat daripada bertindak di luar kawalan norma dan nilai yang dipersetujui bersama. Kedua; kawalan sosial tidak langsung merupakan adat dan sistem kepercayaan atau keagamaan. Kedua jenis kawalan ini merupakan aspek yang mampu mengawal, mempengaruhi dan mengikat setiap anggota masyarakatnya daripada melakukan sesuatu yang dianggap betul atau salah. Bagi sebuah masyarakat, keluarga merupakan agen kawalan sosial yang utama dalam mengawal tingkah laku ahli-ahlinya. Oleh yang demikian, kewujudan perjanjian di dalam Piagam Madinah telah menjadi asas utama dan panduan kepada umat Islam dalam membangunkan negara yang bersatu padu dan harmoni.

Baginda Rasulullah SAW berjaya memimpin kepelbagaian etnik dan agama di Madinah al-Munawwarah melalui dua aspek utama iaitu melalui pemantapan ilmu dan amal ketaatan secara berterusan dalam kalangan penduduk Islam di Madinah dan juga melalui penguatkuasaan undang-undang iaitu perjanjian Piagam Madinah.







Sebagaimana yang telah dimaklumi, para sahabat Baginda sentiasa dibimbing ilmunya secara berterusan bersama Rasulullah SAW melalui pimpinan wahyu yang disampaikan oleh Jibril AS. Ilmu tersebut telah dipraktikkan oleh masyarakat Madinah sehingga aplikasi sifat persaudaraan yang erat, toleransi dan berkerjasama dalam kehidupan mereka dapat dilaksanakan dengan sebaiknya. Begitu juga masyarakat di Malaysia, perlu berusaha memantapkan ilmu naqli dan aqli secara berterusan bagi melahirkan masyarakat harmoni dan sejahtera.

Ini kerana melalui kefahaman ilmu, mampu melahirkan sifat bertanggungjawab kepada amanah yang dipikul, memupuk jiwa masyarakat untuk mentaati syariat agama dan dapat mematuhi apa juga peraturan, garis panduan dan undang-undang yang ditetapkan oleh pihak berwajib dalam sesebuah negara. Hasilnya, keharmonian dalam sesebuah negara dapat dipertingkatkan dan mampu melahirkan masyarakat dan negara yang sejahtera.

Penulisan ini turut melihat antara persamaan yang terkandung di dalam Piagam Madinah dan Perlembagaan Malaysia adalah seperti dalam rajah di bawah :



Sumber: Muhammad Amin bin Ahmad (2020198755)



- ¹ Mubhammad Khairi Nabil Enkhili & Artina Abdillah, "Pengaruh Kelangkaan Datas Karawitan Jember Terhadap Lahir Dan Berkembangnya Sastra Seni dan Humaniora," *Jurnal Ilmiah dan Humaniora*, 18.2 (2021), 142-60.

² <https://console.cloud.google.com/storage/browser/gcp-public-data-sheets-openstack-2015-2016>



Tadabbur Ayat Al-quran Berkaitan Hijrah

Hijrah Nabi Muhammad SAW dan episod-episod yang berlaku di dalamnya adalah ibarat sumber ilmu dan pengajaran yang tidak kunjung habis buat para pengkaji, cendekiawan dan pendakwah Islam sepanjang zaman. Ini bukanlah sesuatu yang pelik dan tidak diragukan lagi bahawa hijrah Nabi SAW adalah aspek pengalaman hidup yang praktikal dengan realiti kehidupan insan bertakwa yang sebenar. Baginda mengalami pelbagai peringkat ujian dan cabaran insani yang merangkumi kebimbangan, kesedihan dan kegembiraan sesuai dengan kehendak Allah SWT. Justeru, para fuqaha, pengkaji, pendakwah dan cendekiawan melalui renungan dan penghayatan hijrah Nabi SAW akan memenuhi apa jua matlamat dan aspirasi asal mereka hingga dizahirkan dapatan tersebut dengan ketetapan undang-undang, ilmu pelajaran, prinsip-prinsip agama, amalan syariah, pertunjuk dan pedomani hidup.



Tidak syak lagi bahawa episod-episod dalam hijrah Nabi Muhammad SAW, walaupun kesemuanya sememangnya penting namun berbeza darjah kepentingan, berbeza tahap keutamaan dan berbeza neraca nilainya. Pasti wujud perbezaan dalam menilai episod-episod ini bergantung dari sudut mana ia dinilai, bermula di mana dan apa kriteria dalam pertimbangan. Oleh itu, untuk berlaku adil dan penilaian lebih tepat maka kita tidak dapat lari daripada kembali kepada Al-Quran itu sendiri dalam menentukan turutan kepentingan kisah, insiden atau episod dalam hijrah.

Justeru, pemilihan episod tertentu dan ulasannya dalam ayat-ayat al-Quran menunjukkan sejauh mana kepentingan episod tersebut. Penyebutan al-Quran tentang episod-episod yang berlaku dalam hijrah Nabi SAW menjadi kriteria yang sah dalam menjelaskan kedudukan dan kepentingan episod-episod tersebut yang sewajarnya mesti menjadi tumpuan dan perhatian oleh generasi ummah sepanjang zaman. Ada sesetengah peristiwa disebutkan dalam al-Quran secara umum berbanding ayat yang lain, ada sebahagian daripadanya dinyatakan dengan cukup terperinci oleh al-Quran, ada episod yang al-Quran menyebut sekali sahaja manakala dalam ayat-ayat lain ia banyak disebut, ada episod diberi ulasan panjang lebar dan ada yang ringkas. Pasti kekerapan ini menjadi neraca bahawa episode tersebut lebih diutamakan berbanding yang lain yang kurang disebutkan. Demikianlah keunikan dan keajaiban al-Quran dalam memberi penekanan agar umat Islam memahami apa yang hendak disampaikan dan ditekankan dalam peristiwa hijrah kepada mereka.

Jika kita merenung kepada penghijrahan Nabi SAW maka kita dapati bahawa al-Quran tidak terhad merujuknya sekali sahaja atau secara sepintas lalu, malahan al-Quran menyerlahkannya dan memberikannya penampilan berturut-turut dalam banyak surah. Adakala disebut beberapa butiran dan faktanya, dan pada masa lain disebut siapa yang melakukannya serta dalam situasi apa mereka berada. Sememangnya al-Quran menyebut mengenai hijrah di banyak tempat, antara yang paling menonjol sebutannya dalam surah al-Baqarah ayat-218, surah Ali-Imran ayat-195, surah al-Anfal ayat-30 dan surah at-Taubah ayat-40.

Bukanlah rahsia lagi di sini bahawa banyaknya rujukan mengenai peristiwa hijrah dan perinciannya dalam al-Quran mendedahkan betapa besarnya peristiwa ini dan menyedarkan kita akan impak kepentingannya yang tidak sama dengan mana-mana peristiwa yang berlaku semasa hidup Nabi SAW.

Al-Quran telah mengulas beberapa perincian peristiwa ini dan sebahagian faktanya, seperti yang terdapat dalam surah al-Anfal yang menyentuh episod terkenal iaitu strategi dan komplot jahat orang Quraisy menentang Nabi SAW dalam usaha untuk menyingkirkannya dan menghalangnya daripada menyampaikan seruan Islam. Walaupun tidak secara langsung daripada peristiwa hijrah, namun lebih kepada beberapa motif dan punca. Firman Allah SWT bermaksud, *"Dan (ingatlah), ketika orang-orang kafir (Quraisy) memikirkan daya upaya terhadapmu untuk menangkap dan memenjarakanmu atau membunuhmu, atau mengusirmu. Mereka memikirkan tipu daya dan Allah menggagalkan tipu daya itu. Dan Allah sebaik-baik Pembalas tipu daya."* (al-Anfal: 30).

Dalam surah at-Taubah pula, al-Quran menceritakan dengan terperinci kedudukan gua dan bagaimana kedudukan Rasulullah SAW dan sahabat Baginda Saidina Abu Bakar RA ketika orang Quraisy mengejar mereka di padang pasir sehingga mereka sampai ke pintu gua tempat mereka bersembunyi di dalamnya.

Firman Allah SWT bermaksud, *"Jika-lau kamu tidak menolongnya (Muhammad) maka sesungguhnya Allah telah menolongnya (iaitu) ketika orang-orang kafir (Musyrikin Mekah) mengeluarkannya (dari Mekah) sedang dia salah seorang dari dua orang ketika keduanya berada dalam gua, di waktu dia berkata kepada temannya: 'Janganlah kamu berduka cita, sesungguhnya Allah beserta kita'". Maka Allah menurunkan kemenangan-Nya ke atasnya dan membantunya dengan tentera yang kamu tidak melihatnya, dan menjadikan kalimat orang-orang kafir itulah yang rendah. Dan kalimat Allah itulah yang tinggi. Allah Maha Perkasa lagi Maha Bijaksana."* (at-Taubah: 40). Selain itu, al-Quran juga mengulas keadaan kaum muslimin yang berhijrah dan menyebutnya lebih daripada sekali dengan paparan penderitaan dan kesabaran mereka. Ini menunjukkan kepada kita bahawa peristiwa ini mempunyai nilai yang tinggi sehingga dirakamkan dengan jelas, berulang dan pelbagai situasi dalam al-Quran.

Status peristiwa hijrah di sisi al-Quran bagi sesiapa yang memperhalusi pendekatan dan metode al-Quran pastinya akan terpegun dan kagum. Lazimnya manusia telah terbiasa bahawa ayat al-Quran yang diturunkan berfungsi sebagai tafsiran terhadap sesuatu kejadian yang berlaku dan memberi hikmah pedoman di sebaliknya. Sekiranya ia menyentuh suatu kemenangan, maka dinyatakan sebab-sebab kemenangan sehingga hilang sebarang keangkuhan. Manakala jika berkenaan kekalahan, maka disebutkan pula alasan dan puncanya dengan terus terang dan jelas. Lantaran itulah maka berpandukan kaedah ini, kita dapati surah al-Anfal diturunkan selepas Perang Badar, surah al-Ahzab diturunkan selepas Khandak, surah al-Fath diturunkan selepas perjanjian Hudaibiyah, dan separuh terakhir surah Ali-Imran diturunkan selepas kekalahan Uhud.



Walau bagaimanapun, jika diteliti peristiwa hijrah dan ulasan al-Quran terhadapnya didapati tidak menggunakan kaedah ini, malahan ia berakhir tanpa ulasan secara langsung atau menyebut apa-apapun mengenainya.

Bahkan yang lebih menarik lagi, ayat al-Quran yang menyebut berkenaan sesuatu episod hijrah sama ada dinyatakan secara berulang-ulang atau ulasan, hanya berlaku selepas bertalunya masa kejadian tersebut dan bukan pada masa ia berlaku. Ayat mengenai peristiwa hijrah dalam surah al-Baqarah adalah diturunkan selepas dua tahun peristiwa hijrah berlaku. Episod hijrah diselitkan dalam ayat yang membicarakan perihal pasukan peninjau utusan Nabi SAW yang diketuai Abdullah bin Jahsy yang terlibat dalam pertempuran pada akhir bulan Rejab iaitu salah satu bulan yang diharamkan berperang. Ini sangat jelas dalam konteks ayat-ayat sebelumnya iaitu firman Allah SWT bermaksud, "Mereka bertanya kepadamu tentang berperang pada bulan Haram. Katakanlah: 'Berperang dalam bulan itu adalah dosa besar; tetapi menghalangi (manusia) dari jalan Allah, kafir kepada Allah, (menghalangi masuk) Masjidil haram dan mengusir penduduknya dari sekitarnya, lebih besar (dosanya) di sisi Allah...' (al-Baqarah: 217).

Sebutan peristiwa hijrah dalam surah Ali-Imran ayat-195 adalah muncul sebagai ulasan mengenai Perang Uhud dan kejadian yang berlaku di dalamnya. Ini kerana separuh kedua daripada surah ini mengulas dan menceritakan berkaitan pertempuran tersebut. Begitu juga peristiwa hijrah yang disebut dalam surah al-Anfal ayat-30 adalah ulasan mengenai Perang Badar. Ini kerana surah al-Anfal diturunkan sebagai tindak balas terhadap peperangan tersebut. Manakala episod hijrah dalam surah at-Taubah ayat-40 adalah ayat paling terkenal dalam membicarakan perihal hijrah. Ulasannya adalah berkait rapat dengan peperangan Tabuk kerana surah at-Taubah mengulas mengenai perihal Tabuk dengan panjang lebar. Lebih menarik lagi, ayat ini diturunkan pada sembilan tahun selepas peristiwa hijrah.



Ulasan dan rujukan al-Quran yang lewat kepada peristiwa hijrah menunjukkan kehebatan dan keistimewaan peristiwa ini. Ini bermakna Allah SWT menerusi al-Quran mengangkatnya sebagai peristiwa paling unggul dan utama, sekalipun disentuh dalam pelbagai tujuan dan berbeza pendekatan. Timbul persoalan, mengapa tidak diturunkan satu surah khas yang membicarakan mengenai hijrah sebagaimana surah-surah lain yang membicarakan peristiwa sesuatu peperangan? Jawapannya, tidak dan ini tidak berlaku. Akan tetapi sesuatu yang lebih agung, besar dan amat penting pula berlaku. Seolah-olah Allah SWT telah menetapkan bahawa peristiwa hijrah itu terlalu besar untuk diulas dalam satu surah yang mana dikupas dan berakhir pembicaraannya. Sebaliknya Allah SWT menetapkan bahawa ingatan tentang hijrah sepatutnya menjadi panduan, pedoman dan teladan yang perlu diambil pengajarannya sepanjang zaman, iktibar perlu dikaitkan dalam banyak perkara dan hikmah perlu berada dalam pelbagai keadaan.



Pandangan al-Quran tentang hijrah membawa isyarat bahawa ia suatu peristiwa yang mesti sentiasa diingati dan perincian episod di dalamnya mesti diingati dalam banyak kesempatan. Ia menunjukkan kepada kita betapa penting dan besarnya peristiwa hijrah ini berbanding peristiwa-peristiwa lain yang berlaku dalam sirah Nabi SAW. Lantaran itu, aspek pengajaran, hikmah dan penghayatan daripada peristiwa hijrah mesti ditanamkan pada fikiran kita setiap masa, perlu hidup dalam hati nurani sepanjang waktu, dan orang ramai perlu sentiasa diingatkan mengenainya sepanjang tahun dalam pelbagai konteks dan situasi.

Justeru, peristiwa hijrah di sisi al-Quran adalah umpama gedung hikmah dan ia bukanlah peristiwa biasa yang diulas sekali sahaja atau disebut sempena kejadian tertentu. Sebaliknya, ia adalah peristiwa terbesar dan paling utama yang kaya dengan pengajaran dan tersirat sejumlah rahsia kekuatan. Oleh sebab itu, ia sewajarnya dirujuk dan diingati dalam setiap masa dan ketika. Mereka yang mengkaji dan mentadabbur peristiwa Hijrah pastinya menyedari betapa besar peranan dan impak hijrah berbanding peristiwa lain dalam sirah Nabawi kepada *survival* umat Islam. Hijrah menjadi titik tolak kepada perubahan nasib kaum muslimin.

Ia umpama pencetus transformasi membentuk dan membina kekuatan umat Islam sendiri. Umat Islam mula bangun berusaha membentuk jati diri, mewarnai cara hidup beragama sebagaimana yang diinginkan seterusnya menyemai dan menanam prinsip agama dalam teras binaan negara dan tanah air mereka. Kerangka negara yang dibina bersama-sama perpaduan yang utuh antara kaum Muhajirin dan Ansar bersekali kesepakatan sosial antara kabilah dan puak, menjadi kayu ukur dan formula kepada kekuatan sebenar sebuah negara. Impak dan kesan ini hanya dapat dilihat dan dirasakan melalui peristiwa hijrah dan bukan dalam peristiwa-peristiwa lain dalam sirah dan sejarah Islam.

Selain itu, peristiwa hijrah penuh dengan hikmah dan pengajaran yang tidak boleh kita abaikan. Secara keseluruhannya, ia mewakili perjuangan para rasul dan pembawa obor kebenaran. Kesusahan dan penderitaan yang mereka tanggung termasuk keperluan untuk melakukan banyak pengorbanan adalah bagi menyokong mesej kebenaran yang mereka perjuangkan dan menyampaikannya kepada orang ramai. Dalam masa yang sama, rahmat, keredaan dan pertolongan Allah SWT mencucuri dan memayungi hamba-hamba-Nya yang beriman lantaran sanggup berkorban demi wahyu-Nya dan menyebarkan risalah-Nya. Hijrah memaparkan betapa Allah SWT sentiasa bersama-sama insan bertakwa pada waktu paling sukar dan getir yang hanya mampu ditempuh berbekalkan segunung kesabaran dan rahmat Allah SWT. Inilah pengajaran hebat daripada hijrah yang perlu kita hayati dalam kehidupan bahawa tiada kejayaan yang dicapai melainkan dengan usaha berterusan, kesabaran yang tinggi, pengorbanan yang tulus, perpaduan yang ampuh serta yang paling penting keizinan dan pertolongan Allah SWT. Oleh itu, episod-episod dalam peristiwa hijrah berserta fakta dan perinciannya perlu sentiasa diulang-ulang, dikaji dan dikupas tanpa henti bagi mengeluarkan khazanah pedoman terutama dalam membentuk masyarakat, membina negara dan membangunkan tamadun. Al-Quran meletakkan peristiwa hijrah pada satu tingkat yang amat tinggi sehingga diselitkannya dalam pelbagai peristiwa lain. Hijrah umpama nadi dan pemangkin kepada kejayaan yang menyimpan pelbagai rahsia kekuatan. Al-Quran telah menyampaikan mesej bahawa semangat hijrah perlu ada dalam setiap tindak-tanduk kehidupan tanpa mengira masa, tempat dan keadaan. Kesabaran, pengorbanan dan perpaduan unggul yang dapat disaksi menerusi peristiwa hijrah tidak akan memberi makna melainkan ia hidup dalam tindak-tanduk, minda dan sanubari kita.

Mukjizat

dalam peristiwa Hijrah

Oleh : **Suhaizam binti Sulaiman**

Penolong Pengarah Kanan

Bahagian Keluarga, Sosial dan Komuniti, JAKIM



Secara umumnya sambutan Maal Hijrah di negara kita sama ada pada peringkat negeri mahupun pada peringkat kebangsaan bertujuan memperingati peristiwa penghijrahan Nabi SAW dari Mekah ke Madinah. Seterusnya sambutan setiap tahun ini adalah antara usaha dan iltizam kerajaan dalam meninggikan syiar Islam agar terus terpelihara dan dimartabatkan di negara kita. Kita sebagai umat Nabi Muhammad SAW sewajarnya mengetahui dan memahami pengkisahan peristiwa hijrah dengan lebih mendalam daripada apa yang berlaku agar memberi kesan keimanan yang lebih baik dalam kehidupan seharian. Hijrah dari sudut bahasa adalah berpindah dari suatu tempat ke sesuatu tempat yang lain, memutuskan hubungan. Dewan Bahasa dan Pustaka (DBP) mendefinisikan hijrah bermaksud perpindahan Nabi Muhammad SAW dari Mekah ke Madinah. Dalam konteks kehidupan pada hari ini, hijrah bermaksud meninggalkan semua bentuk maksiat dan kemungkaran baik dari segi iktikad (pegangan), perasaaan (hati), perkataan dan perbuatan. Menurut al-Quran hijrah mempunyai beberapa pengertian yang mana perkataan hijrah telah disebut dalam al-Quran lebih daripada 28 kali di dalam pelbagai makna dan bentuk. Walau apapun hijrah melambangkan simbol iman yang sejati dan utuh menghadapi pelbagai cubaan dan ujian demi mempertahankan akidah kepada Allah SWT dan Nabi SAW.

Mukjizat Nabi SAW

Mukjizat yang telah berlaku semasa peristiwa hijrah ialah pemuda-pemuda kaum Musyrikin yang diamanahkan untuk mengepung rumah Rasulullah SAW dan mereka tidak nampak kelibat Rasulullah SAW semasa keluar daripada rumahnya. Kaum Musyrikin quraisy telah merancang untuk membunuh Nabi SAW bagi menghalang Baginda mengembangkan dakwah Islam. Perancangan puak Musyrikin untuk membunuh Rasulullah SAW telah gagal bahkan Rasulullah SAW telah meletakkan pasir di atas kepala mereka menyebabkan mereka tidak nampak Nabi SAW keluar dari rumah. Mukjizat yang seterusnya ialah puak Musyrikin telah menjejaki Nabi SAW sehingga sampai ke Gua Thur setelah gagal membunuh Nabi SAW pada malamnya. Mereka gagal menemui Baginda berdua walaupun telah mundur mandir berusaha bersungguh-sungguh kerana telah dikaburi oleh sarang burung yang berada di depan pintu gua menyebabkan mereka tidak menyangka di dalamnya ada Nabi SAW bersama sahabatnya Abu Bakar As-Siddiq RA. Mereka telah pulang ke Mekah dengan perasaan hampa dan kecewa kerana gagal menjejaki Nabi SAW untuk ditangkap dan dibunuh.

Setelah berada selama tiga hari di dalam Gua Thur dan keadaan telah kembali reda, Nabi SAW meneruskan perjalanan bersama sahabat Baginda SAW menuju ke Madinah yang dahulu dikenali dengan nama Yathrib. Semasa dalam perjalanan ke Madinah Nabi SAW telah singgah di khemah Ummu Ma'bad untuk membeli makanan seperti tamar namun tidak ada apa-apa makanan yang boleh dibeli dan disediakan kepada Nabi SAW kecuali seekor kambing yang kurus. Nabi SAW telah meminta izin dengan Ummu Ma'bad untuk memerah susu daripada kambing yang kurus tersebut. Dengan Kuasa Allah, mukjizat Baginda SAW iaitu kambing tersebut telah mengeluarkan susu yang banyak dan boleh diminum oleh semua yang ada di situ walaupun sebelum ini kambing tersebut tidak mengeluarkan susu kerana kurus.



Seterusnya dalam perjalanan menuju ke Madinah, Nabi SAW dan Abu Bakar As-Siddiq telah dikejar oleh Suraqah bin Malik seorang penunggang kuda dan penjejak yang sangat cekap dan hebat. Beliau telah ditawarkan oleh kaum Musyrikin Mekah 100 ekor unta sebagai hadiah dengan syarat mendapatkan Nabi SAW sama ada hidup ataupun mati. Suraqah telah berjaya menjejaki Nabi SAW dan Abu Bakar As-Siddiq. Apabila mengetahui yang dirinya dalam keadaan bahaya, Nabi SAW telah berdoa kepada Allah agar diselamatkan daripada Suraqah. Allah memperkenankan doa Nabi SAW yang menyebabkan Suraqah jatuh daripada kudanya disebabkan kaki kudanya terperosok ke dalam lubang sebanyak tiga kali. Nabi SAW telah datang ke arah Suraqah lalu memberikan pertolongan walaupun Nabi SAW mengetahui niat sebenar Suraqah adalah untuk menangkap dan membunuhnya. Nabi SAW telah memaafkan Suraqah dan menjanjikan bahawa Suraqah akan dipakaikan kalung kebesaran Raja Kisra suatu hari nanti.

Pertolongan tersebut menyebabkan Suraqah teruja dengan akhlak dan sifat Nabi menyebabkan dia membatalkan niatnya untuk membunuh Nabi SAW dan kembalinya ke Mekah beliau telah memaklumkan kepada puak Musyrikin Mekah bahawa Nabi SAW tidak ditemui di jalan-jalan yang dilaluinya.

Selepas lebih kurang 10 tahun, Suraqah telah pergi menemui Nabi SAW semasa pemerintahan Baginda SAW di Madinah dan telah memeluk Islam. Semenjak itu Suraqah sentiasa berada di barisan hadapan dan pendukung setia gerakan dakwah Islam walaupun hanya berkesempatan bersama dengan Baginda SAW selama 9 bulan sahaja. Sehingga pada zaman pemerintahan Saidina Umar Al-Khatab kerajaan Parsi telah ditakluk dan ditewaskan oleh pemerintahan Islam.

Longgokan harta rampasan perang yang melimpah ruah termasuk mahkota, gelang, pedang dan tali pinggang kebesaran Raja Kisra telah ditemui oleh khalifah Umar Al-Khatab dalam rampasan tersebut. Kemudian Saidina Umar RA telah mengenakan mahkota, gelang pedang dan tali pinggang yang merupakan lambang kebesaran Raja Kisra kepada Suraqah dengan iringan takbir. Keadaan ini menyebabkan Suraqah terdiam dan terkenang pada janji dan kebenaran ucapan yang telah disebut oleh Nabi SAW belasan tahun yang lampau. Kesemua ini adalah antara mukjizat Nabi SAW yang telah diberikan oleh Allah kepada Nabi SAW dalam peristiwa hijrah dari Mekah ke Madinah.

Penutup

Dari kisah hijrah ini, pengajaran yang boleh diambil iaitu hijrah Nabi SAW merupakan titik tolak kepada perubahan sejarah umat Islam daripada berada di bawah penindasan, tekanan dan kelemahan kepada kemenangan Islam sehinggakan agama Islam telah tersebar ke pelusuk dunia. Oleh sebab itu, Sayyidina Umar Al-Khatab RA dan majoriti sahabat akhirnya bersetuju menjadikan Muharam sebagai bulan yang pertama dan telah menetapkan perkiraan tahun hijrah Rasulullah SAW dari Mekah ke Madinah dijadikan sebagai tahun pertama dalam takwim Islam.

Rujukan:

www.dartaibah.com : Risalah Hijrah Rasulullah SAW Hikmah dan Pengajaran: Abu Anas Madani Pemsyarah KIAS

<https://www.utusan.com.my/gaya/2020/08/mukjizat-hijrah-nabi-muhammad/>: Prof Madya Dr. Khairul Anuar Mohamad pemsyarah USIM





Meneladani Perancangan, Semangat Dan Minda Hijrah Rasulullah SAW

Bagi mereka yang bersungguh-sungguh menyambut tahun baru, melangkah masuk ke tahun baru itu membawa banyak erti kerana ia ibarat buku catatan baharu hidup seseorang yang akan menjalani hidup untuk tahun seterusnya. Tahun baru boleh menjadi pendorong yang cukup kuat untuk memungkinkan seseorang berusaha dengan lebih gigih dan yakin untuk mencapai apa yang dirancang untuk tahun tersebut. Berjaya atau tidak perancangan itu bergantung kepada kesungguhan yang ditunjukkan dengan berdasarkan kepada ilmu yang dimiliki dan difahami serta pengalaman yang telah dilaluinya.

Berbanding dengan sambutan Ma'al Hijrah yang saban tahun disambut oleh umat Islam seluruh dunia, sambutan tahun baru Islam ini mempunyai dorongan yang berbeza kerana ia mengambil semangat atau roh penghijrahan Baginda Rasulullah SAW dari bumi yang penuh dengan kekufuran dan kemungkaran kepada satu kehidupan yang dinaungi oleh roh keimanan dan keredaan Allah SWT. Maka dengan itu, sambutan tahun baru yang berdasarkan kepada penghijrahan insan yang mulia ini, membawa makna yang jauh lebih besar kerana ia berupaya mengubah hidup seseorang, malah berupaya juga mengubah dunia dan membentuk satu tamadun yang jauh lebih hebat daripada mana-mana tamadun yang pernah dibentuk sebelum itu.

Peristiwa hijrah Rasulullah SAW bukanlah satu peristiwa yang berlaku secara tidak sengaja. Segala-galanya telah dirancang dan disusun dengan rapi oleh Allah SWT agar kita sebagai umat yang terkemudian dapat mempelajari sesuatu daripada peristiwa yang hebat ini. Memang boleh sekiranya Allah menghijrahkan Rasul-Nya dari Mekah ke Madinah dengan mukjizat sepenuhnya. Bahkan penghijrahan Baginda Rasulullah SAW boleh dilakukan dengan cepat dan tanpa perlu bersusah payah, dan Rasulullah pun boleh sampai ke bumi Madinah dengan selesa dan selamat. Tetapi yang jelas Allah tidak mengkehendaki sedemikian. Hijrah telah ditakdirkan berlaku dalam bentuk peristiwa yang menggabungkan unsur perlindungan Ilahi dan juga ikhtiar manusia.



Demikianlah kenyataannya, sepanjang perjalanan hijrah dari mula hingga akhir, ia penuh dengan peristiwa-peristiwa yang cemas dan men-debarkan. Benar Rasulullah mendapat perlindungan Allah, tetapi Baginda juga terpaksa menempuhi perjalanan yang serba pahit dan payah. Bukannya mudah untuk melepasi dari jaring-jaring maut kaum Quraisy yang berhabis-habisan memburu untuk menghapuskan Baginda. Begitu rapinya perancangan kaum Quraisy, namun perancangan hijrah Rasulullah yang diilhamkan oleh Allah jauh lebih rapi dan tersusun.

Sejak bermulanya penghijrahan dari Mekah ke Madinah, Rasulullah SAW memang sudah yakin bahawa Allah akan melindunginya. Namun, demikian Baginda tidak pernah merasa terkecuali daripada kewajiban berikhtiar merencanakan perancangan hijrah dengan sebaik-baiknya. Antara perencanaan penting yang telah diperlihatkan oleh Baginda dalam menjayakan rencana penghijrahan ini termasuklah:

1 Perancangan yang rapi dan teliti. Baginda tidak tidur di biliknya pada malam itu. Sebaliknya Baginda memerintahkan Ali ibn Abi Talib mengambil tempat tidurnya di kamar Baginda dengan tujuan untuk mengelirukan musuh yang menyangka Baginda masih berada di biliknya. Begitu juga Baginda tidak terus berangkat ke Madinah yang berada di sebelah Utara selepas keluar dari Mekah, tetapi sebaliknya Baginda menghala ke Selatan dan berhenti di Gua Thur selama tiga hari. Selepas tempoh tersebut barulah Baginda meneruskan perjalanannya ke Madinah, iaitu ketika gerakan pihak Quraisy sudah mulai mengendur.

2 Sentiasa mendapatkan maklumat terkini berkenaan pergerakan pihak musuh menerusi Abdullah ibn Abu Bakar yang telah ditugaskan untuk mengumpul maklumat di Mekah pada waktu siang dan pada malamnya melaporkan kepada Baginda di Gua Thur. Memang maklumat terkini adalah merupakan suatu yang amat bernilai sehingga kadang-kadang maklumat-maklumat penting sanggup dijual beli dengan harga yang sangat mahal. Hari ini kita dapat menyaksikan semakin canggihnya perancangan perisikan yang tujuannya tidak lain hanya untuk mendapatkan maklumat.

3 Kerahsiaan adalah satu perancangan Baginda yang sangat berkesan. Lihat saja bagaimana tidak seorang pun yang tahu termasuk teman karibnya seperti Abu Bakar RA hinggalah ke saat perlaksanaannya. Menjaga kerahsiaan dalam hal-hal penting dan bahaya seperti itu memang merupakan suatu keperluan yang dirancang rapi. Kebocoran maklumat-maklumat penting hingga diketahui oleh pihak musuh akan mengakibatkan musnahnya seluruh perancangan.

4 Menggunakan sepenuhnya kepakaran yang ada walau daripada orang kafir sekalipun. Dalam peristiwa hijrah, Baginda telah mendapatkan khidmat seorang pemandu bukan Islam untuk menunjukkan jalan sulit yang tidak diketahui oleh orang ramai untuk ke Madinah. Hal ini dilakukan oleh Baginda setelah berpuas hati bahawa pemandu bukan Islam itu tidak akan mengkhianatinya.

Dari peristiwa-peristiwa yang telah berlaku nyata-
lah bahawa hijrah bukan hanya satu rentetan
peristiwa tidak sengaja atau kebetulan yang
terjadi dalam kehidupan Baginda Rasulullah
SAW. Perjalanan hijrah dengan segala liku dan
simpang-siurnya itu jelas mengandungi hikmah
budaya kerja yang berencana (*systematic*). Ses-
uatu cita-cita tidak mungkin dapat dijayakan
dengan doa dan penyerahan semata-mata,
tetapi harus dilaksanakan dengan perencanaan
yang cukup rapi. Yang dimaksudkan dengan
perencanaan atau *planning* ialah suatu aliran
menentukan matlamat, menggariskan
kaedah-kaedah dan tindakan-tindakan untuk
mencapai matlamat tersebut. Sementara yang
dimaksudkan dengan perancangan pula ialah
penggabungan dan penyepaduan pelbagai
sumber yang dimiliki untuk menghadapi perseki-
taran dengan sebaik-baiknya.

Perencanaan juga disebut sebagai jambatan
antara masa kini dengan masa depan yang mem-
bawa erti persiapan masa kini untuk menghadapi
apa yang akan terjadi di masa depan. Ketika
Allah memerintahkan kita agar bersiap
sepenuhnya untuk menghadapi musuh dengan
segala rupa kekuatan sepertimana yang telah
Allah firmankan dalam surah al-Anfal ayat yang
ke-60. Ayat tersebut memerintahkan kita umat
Islam membuat perancangan pertahanan jangka
panjang dengan mengambil kira perubahan-peru-
bahan dan kemajuan-kemajuan yang sedang
berlaku dan akan berlaku dalam bidang ketenter-
aan dan juga teknologi persenjataan.

Lebih-lebih lagi di saat umat Islam menghadapi
ancaman yang datangnya bukan sahaja dalam
bidang ketenteraan, malah telah meningkat kepada
ancaman-ancaman bentuk lain termasuk budaya,
pendidikan dan ekonomi, maka perintah Tuhan,
“...*wa’iddu lahum...*” (bersiaplah menghadapi
mereka...) itu harus pula difahami dari sudut seman-
gatnya dengan membuat perancangan-perancan-
gan yang bernas lagi rapi dalam bidang-bidang lain
seperti ilmu, kebudayaan, pendidikan, ekonomi dan
sebagainya.

Lebih jauh dari itu al-Quran juga telah
menampilkan peribadi Nabi Yusuf AS sebagai
tokoh mithali perancang ekonomi sebagaima-
na yang diterangkan kepada kita dalam surah
Yusuf, ayat yang ke-47 hingga ke-49. Di
dalam ayat tersebut, Nabi Yusuf AS telah
menyarankan suatu perancangan ekonomi
pertanian untuk jangka waktu empat belas
tahun dengan membuat perimbangan di
antara jumlah penghasilan, penggunaan,
penyimpanan dan pelaburan semula. Dengan
perencanaan bersifat melihat ke hadapan ini
(*speculation*), krisis ekonomi yang dikhuatiri
akan menimpa negara dapat dihindarkan.



Dalam zaman yang penuh persaingan seperti sekarang ini, kecemerlangan dan keunggulan hanya akan dapat dicapai dengan penyuburan budaya kerja berencana dan pemikiran bernas. Sehubungan dengan itu budaya *ad hoc* seharusnya dihindari kerana ia bukan budaya yang terpancar dari ajaran Islam.


Memang manusia hanya boleh merencana, tetapi Allah jua yang menentukan jaya atau tidaknya. Namun manusia tetap diwajibkan merencana dan melaksanakan rencananya dengan setepat-tepatnya. Rencana yang rapi tetapi tidak dilaksanakan sebagaimana sepatutnya akan berakhir dengan kegagalan. Demikianlah apa yang telah terjadi dalam Perang Uhud. Perancangannya sudah cukup rapi. Tetapi ada pasukan yang kurang berdisiplin lalu mengabaikan pelaksanaan yang telah direncanakan, maka akibatnya pasukan Islam mengalami pukulan teruk.

Demikianlah pentingnya perancangan yang rapi untuk mencapai matlamat yang kita cita-citakan. Di samping itu, seperkara yang harus diambil ingatan ialah sepanjang aliran perancangan, mulai dari matlamat hinggalah kepada cara dan langkah-langkah mencapainya, harus dipastikan tidak menyimpang dari hukum dan akhlak kerana dalam ajaran agama Islam, tujuan tidak menghalalkan cara.

Seterusnya mengambil semangat hijrah Rasulullah SAW, untuk menjadi lebih baik dan membina kehidupan dekat dengan Allah SWT perlu kepada perancangan rapi. Sesungguhnya kegagalan sebenar adalah tatkala gagal untuk merancang.

Usah takut untuk berubah jika yakin perubahan itu membahagiakan. Cari jalan untuk menjadikan setiap individu bisa menyumbang sesuatu dalam penghijrahan diri mahupun organisasi kerana kemenangan Islam perlu kepada pembabitkan semua walaupun individu yang belum beragama Islam.





Memahami MAKSUD DAN TUJUAN Hijrah

Oleh:
Majidah binti Mat Jusoh
Penolong Pengarah Kanan,
Bahagian Dasar Kemajuan Islam, JAKIM



Hijrah merupakan peristiwa yang signifikan dalam sejarah Islam dan memiliki pengaruh besar terhadap perkembangan agama dan umat Islam. Hijrah dalam bahasa Arab disebut sebagai al-Hijrah (الهجرة) yang berasal daripada perkataan هجر yang bermaksud seseorang yang memutuskan, meninggalkan, mencegah, menghalang, atau memulaukan sesuatu (Ibn Manzur, t.th; al-Mu'tamad, 2000; Mohd Nur Hidayat et al, 2019). Kata terbitan daripada perkataan هجر iaitu هاجر dan مهاجرة membawa maksud "berpindah". Sehubungan itu, perkataan al-hijrah didefinisikan sebagai seseorang yang meninggalkan atau berpindah dari sebuah tempat ke tempat lain (al-jubari, t.th; Mohd Nur Hidayat et al, 2019) atau dari sebuah negara ke negara yang lain (al-Fayruz Abadi, 2005; Mohd Nur Hidayat et al, 2019) dengan tujuan untuk bermastautin (Abi al-Husayn Ahmad, t.th; Mohd Nur Hidayat et al, 2019).

Menurut Tafsir Ibn Katsir, "hijrah" secara harfiah merujuk kepada konsep migrasi atau perpindahan dari satu tempat ke tempat lain dengan tujuan mempertahankan atau memperbaiki iman dan keislaman seseorang. Umpamanya dalam konteks sejarah Islam, penghijrahan Rasulullah SAW bersama para sahabat dari Mekah ke Madinah untuk menghindari penindasan dan mencari lingkungan yang lebih kondusif untuk menyebarkan Islam.

Namun, penghijrahan ini bukan sekadar perpindahan fizikal semata-mata tetapi juga simbolik bagi transformasi besar dalam sejarah Islam yang menjadi titik permulaan pembentukan masyarakat Islam yang mandiri dan kuat. Momen kritikal dalam sejarah Islam ini telah mengubah dinamika dakwah dan penyebaran agama Islam hingga kini.

Walau bagaimanapun, kalimah "hijrah" dalam al-Quran mahupun hadis, tidak hanya dibatasi dengan maksud berpindah secara fizikal dari satu tempat ke tempat yang lain semata-mata. Tetapi dimaknai dengan maksud yang lebih mendalam dan luas melibatkan aspek spiritual, sosial, dan politik yang mana intipatinya turut menekankan unsur-unsur akidah, syariah dan akhlak. Perkara ini dapat dilihat dalam Kitab Ihya' Ulumuddin karya Imam Al-Ghazali, yang mengaitkan hijrah dengan konsep tasawuf dan pembersihan hati. Menurut beliau, hijrah adalah meninggalkan sifat-sifat buruk dan dosa-dosa menuju keadaan yang lebih bersih dan dekat dengan Allah SWT. Sebagaimana sabda Rasulullah SAW: "Orang yang sebenar-benar hijrah ialah orang yang berhijrah meninggalkan apa-apa yang dilarang oleh Allah (daripada melakukannya)." (Riwayat al-Bukhari, Abu Daud dan Al-Nasaie).

Seiring dengan perubahan dan peredaran zaman, tujuan serta matlamat berhijrahan manusia turut berubah. Dalam konteks kehidupan umat Islam kini, konsep hijrah diaplikasikan untuk pelbagai aspek transformasi diri dalam usaha meninggalkan keburukan dan memperbaiki akhlak ke arah yang lebih baik demi menjadi individu yang lebih beriman dan bertakwa. Perubahan gaya hidup daripada tidak sihat kepada yang lebih sihat dan produktif juga memberi konotasi besar dalam memaknai sebuah penghijrahan.

Dalam hal ini, hijrah mengajar kita untuk sentiasa berusaha memperbaiki keadaan. Bahkan, dalam dunia yang serba moden dan semakin kompleks dengan pelbagai bentuk mehnah dan tribulasi ini, matlamat hijrah lebih berfokus kepada aspek kemajuan pendidikan dan ilmu pengetahuan. Usaha untuk meninggalkan segala bentuk kemunduran dan kemiskinan, kejahilan, ketidakadilan, dan kezaliman dengan menuju kepada kemajuan, keadilan, dan kesejahteraan adalah menjadi tujuan utama penghijrahan. Hal ini melibatkan usaha memperbaiki sistem pendidikan, ekonomi, dan politik dalam rangka mencapai masyarakat yang lebih adil dan berdaya saing. Oleh itu, matlamat hijrah boleh diasosiasikan kepada dorongan untuk terus belajar dan mencari ilmu, meninggalkan kejahilan untuk mencapai pengetahuan yang dapat memajukan diri dan masyarakat, sekaligus memberi peningkatan kualiti hidup ke arah kehidupan yang lebih baik, sama ada dari segi ekonomi, kesihatan, mahupun kebahagiaan hidup. Perubahan sosial turut menginspirasi penghijrahan daripada masyarakat yang tidak adil atau rosak kepada masyarakat yang lebih adil, harmoni, dan beretika.

Dalam dunia kini yang semakin berantakan dengan konflik yang tidak berkesudahan, apakah konsep hijrah masih relevan diterapkan bagi mencapai kesatuan ummah? Persoalan ini dijawab secara terang dalam sabda Rasulullah SAW, "Penghijrahan tidak akan terputus selagi tidak terputus taubat dan taubat tidak akan terhenti sehingga terbit matahari daripada barat." (Riwayat Abu Daud). Meskipun peristiwa penghijrahan Rasulullah SAW dari Mekah ke Madinah sudah selesai 1400 tahun yang lalu, namun prinsip hijrah tetap relevan sepanjang zaman. Imam Nawawi dalam kitabnya *Riyadhus Solihin* turut menjelaskan bahawa hijrah akan terus kekal relevan hingga hari kiamat, sama ada hijrah secara fizikal mahupun hijrah spiritual dan rohani.

Oleh itu, dalam usaha memperkasakan kesatuan ummah, semangat hijrah dilihat dapat menjadi inspirasi untuk mencari penyelesaian yang membina dan menguntungkan masyarakat serta negara. Hal ini dapat dicapai melalui kerjasama merentasi sempadan negara dan etnik, mem-

perkukuhkan solidariti dan saling membantu dalam menghadapi krisis kemanusiaan. Hijrah juga mampu menjadi pemangkin kesatuan ummah apabila masyarakat bersatu hati dan memiliki kesatuan fikiran (*wahdatul fikr*) dalam meletakkan matlamat, hala tuju, sikap dan pandangan yang membentuk kesatuan tindakan (*wahdatul amal*) dalam menjayakan sesuatu perancangan, penyusunan strategi dan tenaga bagi mencapai sesuatu matlamat yang ditetapkan. Melalui kesatuan fikiran dan kesatuan tindakan ini, secara tidak langsung mampu mewujudkan kerjasama erat tanpa mengira agama, bangsa dan budaya serta semangat kebersamaan akan sentiasa terpupuk atas dasar solidariti dan kesefahaman.

Hakikatnya, peristiwa hijrah Rasulullah SAW dan para sahabat dari Mekah ke Madinah membuktikan bagaimana penghijrahan fizikal dan spiritual mampu menjadi pemangkin kesatuan ummah. Hal ini dibuktikan melalui perkembangan Islam yang bermula dari penghijrahan tersebut sehinggakan pemerintahan Islam berjaya mencapai kegemilangan pada zaman Kesultanan Uthmaniyah yang merupakan pemerintahan terbesar dan terlama di dunia selama lebih 600 tahun (1299 – 1922) di tiga benua iaitu Eropah, Asia dan Afrika.

Kesimpulannya, hijrah merupakan konsep hidup yang kaya dengan makna dan tujuan yang melangkaui bukan sekadar perpindahan fizikal semata-mata. Ia mencerminkan semangat perjuangan dalam membina masyarakat yang berlandaskan nilai-nilai Islam, meningkatkan kemajuan dan memperluaskan keharmonian. Dalam konteks kini, hijrah menginspirasi umat Islam untuk melakukan transformasi diri dan masyarakat ke arah yang lebih baik dan beretika. Oleh itu, memahami maksud dan tujuan hijrah membantu kita menghargai kepentingannya dalam sejarah dan kehidupan umat Islam sepanjang zaman. Yakinlah dengan janji Allah SWT dalam surah an-Nisa' ayat 100, "Dan sesiapa yang berhijrah pada jalan Allah (untuk membela dan menegakkan Islam), nescaya ia akan dapati di muka bumi ini tempat berhijrah yang banyak dan rezeki yang makmur, dan sesiapa yang keluar dari rumahnya dengan tujuan berhijrah kepada Allah dan Rasul-Nya, kemudian ia mati (dalam perjalanan), maka sesungguhnya telah tetap pahala hijrahnya di sisi Allah. Dan (ingatlah) Allah Maha Pengampun, lagi Maha Mengasihani."



Hijrah: Membina nilai

Ketuhanan & Kemanusiaan

Menelusuri peristiwa Hijrah Baginda Rasulullah SAW, ianya akan memberikan kita suatu pengajaran dan pedoman yang sangat penting. Meskipun, peristiwa hijrah ini telah berlaku lebih daripada 1445 tahun yang lepas, setiap kronologi dalam peristiwa hijrah akan tetap dikenang sehingga kini.

Apatah lagi apabila kita membicarakan nilai ketuhanan dan kemanusiaan, ternyata ia dapat disingkap daripada peristiwa hijrah Baginda. Dalam membincangkan nilai ketuhanan, kita akan mendapati betapa Rasulullah SAW merupakan seorang utusan Allah yang akan mendapat pimpinan Allah pada setiap masa dan keadaan melalui wahyu-Nya. Ini bermaksud ia bukan daripada kehendak hawa nafsu Baginda, sebaliknya ia merupakan simbolik kepatuhan seorang hamba kepada Tuhannya. Allah SWT menyebut di dalam surah al-Najm, ayat 3 dan 4 yang bermaksud *"Dan dia (Mubammad) tidak memperkatakan (sesuatu tentang Islam) menurut pendapat dan kemahuannya sendiri. Segala yang diperkatakan itu (sama ada al-Quran atau hadis) tidak lain hanyalah wahyu yang telah diwahyukan kepadanya".*

Justeru, setelah mendapat arahan daripada Allah SWT untuk berhijrah dari Makkah ke Yathrib, maka Rasulullah SAW mula mengatur strategi dan pelan terbaik untuk melaksanakan apa yang telah diperintahkan. Namun begitu, Baginda tetap menggantungkan pengharapan dan tawakkalnya hanya kepada Allah SWT kerana jika dinilai dari logik akal, mustahil Baginda dapat berhijrah ke Yathrib begitu sahaja. Pasti Baginda akan dikepung, dihalang bahkan mungkin dibunuh oleh pimpinan kafir Quraisy yang sudah mula melihat Baginda sebagai ancaman kepada mereka di Mekkah pada waktu itu. Di sini, kita mempelajari lagi nilai ketuhanan seterusnya, bahawa sehebat mana pun seorang insan, tatkala berhadapan dengan ujian, kesusahan dan halangan, maka dia akan kembali bergantung kepada Tuhan.

Selanjutnya, dalam peristiwa hijrah ini, Baginda memohon Saidina Abu Bakar As-Siddiq RA untuk menemani Baginda dalam perjalanan hijrah yang akan ditempuh. Sebagai seorang sahabat karib dan juga bapa mertua Rasulullah SAW, kasihnya Abu Bakar kepada Baginda melebihi kasih seorang sahabat dan mertua. Sebaliknya, kasihnya kepada Baginda melambangkan kasih yang sangat hebat dari seorang umat kepada kekasih dan utusan Allah, bahkan sanggup bergadai nyawa kerana Baginda. Di sini, kita mencungkil nilai kemanusiaan yang sangat tinggi yang ada pada Abu Bakar. Beliau sanggup mengutamakan Rasulullah berbanding dirinya sendiri, dan inilah nilai ukhuwah atau tali persaudaraan tertinggi di dalam Islam.

Kita juga melihat pengorbanan yang dilakukan oleh dua orang anak Saidina Abu Bakar As-Siddiq RA iaitu Abdullah dan juga Asma'. Ketika Nabi Muhammad dan Abu Bakar berhijrah, Abu Bakar meminta Abdullah untuk mendengarkan percakapan orang-orang di Mekah dan melaporkan berita itu kepada mereka di Gua Tsur setiap malam. Abdullah melaporkan bahawa kaum Quraisy telah menawarkan seratus unta kepada siapa sahaja yang berjaya menangkap Nabi Muhammad. Setiap pagi, ketika dia meninggalkan gua, pembantu Abu Bakar iaitu Amir bin Fuhayrah, akan memimpin kawanan kambing melalui jalan yang sama untuk menutupi jejaknya, sekaligus memberi air susunya kepada Nabi. Dalam konteks ini, kita mempelajari suatu nilai kemanusiaan terpenting iaitu patuh kepada arahan pimpinan. Tanpanya, segala perancangan akan gagal dan terbongkar, bahkan dalam situasi ketika itu akan membahayakan nyawa Baginda dan Abu Bakar.

Seterusnya, usaha gigih Asma' binti Abu Bakar yang membawa bekalan kepada Baginda dan ayahnya juga adalah sangat terpuji. Walaupun Asma' seorang wanita, namun ia tidak membataskan sumbangannya dalam peristiwa hijrah Baginda. Ini menunjukkan nilai kemanusiaan yang agung kerana apabila seorang anak berbakti dan membantu ayahnya dan juga seorang Rasul utusan Allah, ia lambang pengorbanan yang sangat hebat. Bahkan dalam sesetengah riwayat, dikhabarkan Asma' menaiki Gua Thur tempat persembunyian Baginda dan ayahnya buat seketika waktu, dalam keadaan mengandung.

Seterusnya, apabila kita melihat hijrah yang dilakukan oleh para sahabat bersandarkan hadis berkenaan kepentingan niat, maka kita akan mendapati apabila kita mengutamakan Tuhan berbanding manusia, maka semua urusan akan dipermudahkan dan mendapat pahala. Sebaliknya, apabila kita mengkasadkan sesuatu perbuatan kebajikan bukan kerana Allah, tetapi kerana makhluk, maka terafi segala pahala dan ganjaran untuknya. Ia disebut dengan jelas oleh Baginda Nabi SAW dalam hadis berikut yang bermaksud *"Sesungguhnya setiap amalan berdasarkan niat. Dan sesungguhnya setiap orang mengikut apa yang dia niatkan. Maka sesiapa yang hijrahnya kepada Allah dan Rasulnya, maka hijrahnya kepada Allah dan Rasulnya. Dan sesiapa yang berhijrah kerana dunia untuk dia dapatinya atau perempuan untuk dikahwininya, maka hijrahnya mengikut apa yang dia hijrah kepadanya."* (Riwayat Imam Bukhari).

Kesimpulannya, peristiwa hijrah Rasulullah SAW benar-benar mengajar kita tentang nilai ketuhanan yang sangat penting, betapa Allah SWT berkuasa atas tiap-tiap sesuatu. Dia mampu untuk menjayakan atau menggagalkan perancangan hamba-Nya. Justeru, bertawakkal kepada-Nya setelah berusaha adalah nilai ketuhanan yang sangat penting untuk dihayati. Seterusnya, nilai kemanusiaan dalam peristiwa hijrah mengajar kita bahawa seseorang sanggup untuk menggadai nyawa demi seseorang yang dikasihinya. Dan ia sangat bermakna, jika kasihnya itu kepada seorang Rasul utusan Allah yang juga merupakan kekasih-Nya, Rasulullah SAW. Dan peristiwa hijrah ini akan lebih bermakna apabila kita umat Baginda di akhir zaman, menghayati dan mengamalkan setiap nilai ketuhanan dan nilai kemanusiaan dalam kehidupan kita pada hari ini agar mendapat keredaan Allah SWT.

IBRAH PERISTIWA HIJRAH

*Rasulullah
SAW*

Peristiwa hijrah Nabi Muhammad SAW adalah satu peristiwa yang signifikan dalam sejarah Islam. Ia adalah titik permulaan kepada pengembangan Islam ke seluruh pelusuk dunia. Madinah Al-Munawwarah menjadi kota pemangkin kepada gerakan dakwah Nabi SAW yang lebih meluas. Sirah telah mencatatkan bahawa Rasulullah SAW telah berdakwah selama dua puluh tiga tahun iaitu 13 tahun di Mekah dan 10 tahun di Madinah. Ketika berada di kemuncak dakwah Nabi SAW di Mekah, Allah SWT telah memerintahkan Nabi SAW untuk berhijrah ke Madinah. Nabi SAW menerima perintah Allah SWT ini dengan berlapang dada dan hati yang penuh ikhlas kepada Allah SWT.

Ketika penghijrahan ini, Rasulullah SAW bersama Sayidina Abu Bakar as-Siddiq telah melalui sebuah perjalanan yang sangat mencabar dan penuh dengan halangan. Namun berkat usaha yang gigih dan penuh kesabaran, Baginda Rasulullah SAW dan Sayidina Abu Bakar as-Siddiq akhirnya telah berjaya sampai ke bumi Yathrib (Madinah) dengan izin Allah SWT dan Baginda SAW seterusnya melaksanakan dakwah yang berterusan sehingga Baginda berjaya membentuk sebuah negara Islam yang kukuh dan utuh di bumi Madinah. Justeru itu, yang penting umat Islam perlu sentiasa menyelusuri sirah Nabi SAW dan mengambil ibrah atau pengajaran dari peristiwa hijrah Nabi SAW agar ia dapat menjadi pedoman dalam memacu hidup kita ke jalan yang diredhai Illahi.

Oleh:
Norzaidan bin Haji Hamad
Ketua Unit Komunikasi Korporat, JAKIM



Langkah seterusnya Nabi SAW telah mempersaudarakan umat Islam dalam kalangan Muhajirin dan Ansar. Menurut Sheikh Muhammad Al-Ghazali, persaudaraan ini adalah bagi mencairkan asabiah jahiliyyah hingga yang tinggal hanya ruh Islam sahaja supaya segala perbezaan keturunan, warna kulit dan kedaerahan semua dihancurkan dan yang tinggal hanya Islam, tiada suatu pun yang boleh membanggakan seseorang atau merendharkannya kecuali dengan ketakwaan sahaja.

Firman Allah SWT dalam surah al-Hujurat ayat 13 yang bermaksud:

"Sesungguhnya orang yang paling mulia di antara kamu disisi Allah ialah orang yang paling takwa di antara kamu. Sesungguhnya Allah Maha Mengetahui lagi Maha Mengenal".

Manifestasi dari peristiwa hijrah Nabi SAW ini adalah amat relevan kepada realiti kehidupan ummah pada hari ini. Ia amat penting untuk kita jadikan panduan dan pengajaran dalam meniti kehidupan di negara ini yang mempunyai masyarakat berbilang kaum, bangsa dan agama. Yang penting kita semua perlu menyetepikan perbezaan ini sebaliknya terus berusaha mengekalkan perpaduan dan kesatuan di bawah payung Gagasan Malaysia dan merangka strategi kehidupan yang harmoni agar kita dapat mencapai kejayaan (al-Falah) yang hakiki secara bersama selari dengan tema sambutan Maal Hijrah pada tahun ini iaitu:

"Al-Falah Pemacu Malaysia Madani"

Sebagai kesimpulan, ibrah peristiwa hijrah Nabi SAW adalah untuk menanam sikap bersungguh-sungguh dalam melaksanakan serta mencapai sesuatu objektif dan visi dalam kehidupan kita. Semoga sambutan Maal Hijrah pada tahun ini akan mampu membina momentum kukuh dalam diri masyarakat di negara ini dan membuat penghijrahan diri daripada segala sifat negatif kepada sifat-sifat yang positif. Kita perlu menjauhkan diri daripada sikap malas, lesu dan berfikiran tertutup dalam mengharungi pelbagai cabaran kehidupan serta ujian yang datang daripada Allah SWT dan meletakkan keyakinan dan kepercayaan sepenuhnya kepada Allah SWT, Tuhan Yang Maha Pengasih dan Maha Penyayang.



BUKU BAHARU TERBITAN JAKIM

JOM KENALI BUKU TERBITAN JAKIM

2024



Untangling Khunuthah Condition An Approach from Islamic Biomedical Ethics

Penulis: Dr. Taqwa binti Zabidi

This book explores the dynamic Islamic perspectives on resolving biomedical issues for individuals with khunūthah. It starts with a lexicological study of khunūthah, followed by a biological perspective, setting the stage for managing Muslim patients with khunūthah. It concludes with juristic rulings on khunūthah for cases where gender reassignment isn't feasible, addressing individuals with non-binary genders.



Ibrah Surah al-Kahfi & Ibrah Surah Yusuf

Penulis: Prof. Dr. Makmor Tumin & Dato' Prof. Zulkifli Mohd Yusoff

Surah al-Kahfi merupakan surah yang banyak menceritakan tentang ujian kehidupan daripada sudut wang ringgit, harta, kepintaran, kekuasaan dan akidah. Penulisan buku ini disampaikan dengan kaedah yang lebih bersahaja atau santai bagi melancarkan penyebaran mesej yang ada dalam ayat-ayat Surah al-Kahfi ini.

Buku Ibrah Surah Yusuf ini ditulis bagi membincangkan peringatan Allah SWT yang menghendaki hamba-Nya mengetahui kisah nabi-nabi terdahulu sebagaimana yang ada di dalam al-Quran kerana penuh dengan pedoman baik dari segi akidah, hukum-hakam, dan ibadah.



Diskusi Isu Aqidah dan Pemikiran Semasa di Malaysia

Penulis: Dr. Mohd Aizam bin Mas'od

Terjemahan ke tulisan braille diuruskan oleh Seksyen Penerbitan Pelbagai Cawangan Pengurusan Penerbitan, Bahagian Penerbitan JAKIM

Buku ini memberi kupasan yang komprehensif mengenai isu-isu semasa aqidah merangkumi isu-isu Islam dalam perlembagaan, ajaran sesat, Islam liberal, pluralisme agama, bid'ah, antimazhab, mistisisme, khurafat dan fatwa aqidah semasa. Semoga informasi yang dipaparkan dapat dimanfaatkan sepenuhnya oleh pembaca, khususnya masyarakat Islam

Ayat-Ayat Larangan

Penulis: Panel Penulis JAKIM

Terjemahan ke tulisan braille diuruskan oleh Seksyen Penerbitan Pelbagai Cawangan Pengurusan Penerbitan, Bahagian Penerbitan JAKIM

Buku ini disusun dengan mengumpulkan ayat-ayat al-Quran yang berkaitan dengan sesuatu larangan atau tegahan yang kemudiannya dikategorikan menjadi 18 bab. Buku ini amat berguna kepada para pendakwah, pengkaji, kaunselor, penceramah, pendidik, khatib, ketua masyarakat, ibu bapa dan pelajar.





يَاسِن رَسْتُو
YAYASAN RESTU

Promosi Sejuta Al-Quran **RM38/SENASKAH**



DuitNow

BANK ISLAM

16018010019680

Yayasan Waqaf Malaysia

Sebanyak 5% atau apa-apa jumlah % daripada sumbangan adalah caj pengurusan kepada YWM seperti dipersetujui oleh Jawatankuasa Syariah YWM

Bagi mendapatkan resit rasmi, sila hantar slip sumbangan ke alamat emel:
info@ywm.gov.my / WhatsApp: 019-2007481



Yayasan Waqaf Malaysia
www.ywm.gov.my

PELUANG BERIBADAH MELALUI KEMPEN SOLIDARITI SEJUTA AL-QURAN

Firman Allah SWT melalui surah Ali Imran, ayat-2 yang bermaksud:

"Kamu tidak sekali-kali akan dapat mencapai (hakikat) kebajikan dan kebaktian (yang sempurna) sebelum kamu dermakan sebahagian dari apa yang kamu sayangi. Dan sesuatu apa jua yang kamu dermakan maka sesungguhnya Allah mengetahuinya."

- Kempen ini adalah suatu inisiatif mengajak orang ramai untuk mawakutkan nilai berjumlah RM38.00 bagi senaskah al-Quran sebagai tindak balas penuh hikmah Kerajaan terhadap tragedi pembakaran al-Quran di Sweden.
- Inisiatif ini adalah selari dengan pengumuman YAB Perdana Menteri untuk mencetak sejuta naskhah al-Quran bertajaan diudokan ke seluruh dunia.
- Jom kita sama-sama berwakaf! Jangan lepaskan peluang anda untuk berakhlak & menyebarkan manfaat kebajikan melalui kempen ini seluasnya ke seluruh alam. Barakallahfikum.